

- 1 alġat rbbi ašku nttan a-ifulkin,  
ar-bdda-iskar s-lħnant-ns izgan.
- 2 alġat rbbi kunni lli-ijjnm,  
ikks-kn-d i-lhalak ig-kn ġ-laman.
- 3 issmun-kn-d kullukn zġ-tmizar aggugin,  
yaw-i-kn-d zġ-użlmađ ula afasi,  
zġ-usġlay n-tafukt ar amtar-ns.
- 4 kra gigun ar-itlulli ġ-şşahra iħwan.  
ur-ufin tamdint ma-ġ-a-tgguzn.
- 5 itġaşa-uwl-nsn tdr-tdwast-nsn,  
inġ-tn irifi ula laż iggutu.
- 6 ġ-tnukmut-an ad-ġran i-sidi rbbi,  
hati ijjnm-tn zġ-taġuft-nsn.
- 7 yawi-tn ħayna ġ-yan-uġaras inmn,  
aylliġ ruħn tamdint lli-ġ-rad-zdġn.
- 8 ad-alġn rbbi f-lħnant-ns da-izgan,  
d-lejayb da-iskar f-ssibt n-bnadm.
- 9 ar-isswa rbbi kullu wanna yaġ irifi,  
ar-işşbae s-lħir wanna inġa laż.
- 10 kra gigun ityawkrraf s-ssnasl n-uwzzal,  
rfufnn ġ-tillas d-umalu l-lmut.
- 11 ġin a-ġ-qaman ašku ešan rbbi,  
ħgrn ntni luşiyat n-walli yattuyn.
- 12 issizzay fllasn anhatat išqan,  
đrn s-wakal laħ ma-tn-itēawann.
- 13 ġ-tnukmut-an ad-ġran i-sidi rbbi,  
hati ijjnm-tn zġ-taġuft-nsn.
- 14 issufġ-tn-d zġ-tillas ula amalu l-lmut,  
ibbi ssnasl-nsn irzm-asn.
- 15 ad-alġn rbbi f-lħnant-ns da-izgan,  
d-lejayb da-iskar f-ssibt n-bnadm.
- 16 ar-irzża rbbi iflwan n-wanas,  
ar-itbbi ula ifggign n-uwzzal.
- 17 kra gigun iwrri inufl s-ddnub-ns,  
hrşn ašku ffuġn zġ-iwaliwn n-rbbi.
- 18 krhun amşšu akmurn-in s-lmut.
- 19 ġ-tnukmut-an ad-ġran i-sidi rbbi,  
hati ijjnm-tn zġ-taġuft-nsn.
- 20 yazn-d awal ħayna ijjui-tn,  
ikks-tn-d i-lhalak n-umđdal illasn.
- 21 ad-alġn rbbi f-lħnant-ns da-izgan,  
d-lejayb da-iskar f-ssibt n-bnadm.
- 22 ad-fkn i-rbbi tiwafkiw n-şşukr,  
ar-ttirim bdrn kullu iskkirn-ns.
- 23 ar-ssudun wiyyađ ġ-wanawn f-imdwan,  
ar-saġn ar-zznzan ġ-tama n-waman.
- 24 ġ-umda idran a-ġ-zran lejayb n-rbbi,  
ġin a-ġ-ssmaqqln jjhd n-iskkirn-ns.
- 25 yazn-d awal yawi-d ađu itjħhdn,  
issduy amda issattuy tađangiwin.
- 26 ar-aqlayn ar iggi ar-tgguzn ar izdar,  
ġuwđn bahra akmurn ad-ħsin.
- 27 ar-tmlilin ar-ttarn zund iskayriyn,  
duhdun ur-akk<sup>w</sup>-ssinn ma-rad-skrn.
- 28 ġ-tnukmut-an ad-ġran i-sidi rbbi,  
hati ijjnm-tn zġ-taġuft-nsn.
- 29 issfsa ađu issbidd tađangiwin,
- 30 issħnnu ul-nsn s-umda izgan.  
yaw-i-tn ġ-laman ar lmrša lli-ran.
- 31 ad-alġn rbbi f-lħnant-ns da-izgan,  
d-lejayb da-iskar f-ssibt n-bnadm.
- 32 ad-mjjdn rbbi ġ-gr willi-t-itēbadn,  
ħmdn-t ġ-umnaggar n-imġarn n-mddn-ns.
- 33 issruħ-d taġart i-isaffn n-waman,  
irar taleinin gnt ig<sup>w</sup>đyan irufan.
- 34 lliġ izra lħşant n-willi ġin zdġnin,  
irar akal išwan ig amlal imarġn.
- 35 ifk taleinin i-şşahra irufan,  
irar lburr iqqurn ig timdiwin n-waman.
- 36 yawi-d s-wakal-an ġwilli inġa laż,  
bnun yat-tmdint a-ġis-zdġn.
- 37 awin-d amud zżun asġar n-wađil,  
asin timiħar zġ-igran-nsn.
- 38 ibark-tn rbbi igatn darsn tarwa,  
ur-yudji aţtan a-ilkm lksibt-nsn.
- 39 lliġ đrn ntni nrwn-tn ayt-imig,  
knun ġ-ddu tazayt n-tkrrayt ula tarfufnt,
- 40 issufġ rbbi ġwilli fllasn itak<sup>w</sup>ln,  
yazn-tn ad-jlun ġ-lħla yaggugn.
- 41 ikks-d ġwilli đfnin i-tnukmut išqan,  
issigt-asn tarwa zund lksibt-nsn.
- 42 frħn ayt-ufulki s-mayd iskr rbbi,  
imma ayt-lħşant laħ-asn ma-ttinin.
- 43 yan dar leaql, a-stt-yawi ġ-kullu mayad,  
iswangm ġ-lħnant n-rbbi da-izgan.